



ԳԱՅԱՆԵ ՇԱԲՈՒՆՑ

ԴՐՎԱԳՆԵՐ ՏԱՐՄԱՅԻՃ ՕՐԲԵԼՅԱՆԻ ԴՈՒՍՏՐ ԱՍՓՍՅԻ ԳՈՐԾՈՒՆԵՈՒԹՅՈՒՆԻՑ*

Սույն հոդվածում սկզբնաղբյուրների հենքի վրա ներկայացվում է Խաչենի իշխանուհի, ծագումով սյունեցի Ասփայի բարենորոգչական գործունեությունն Արցախում:

Սյունիք-Արցախ առնչությունները չեն սահմանափակվել միայն քաղաքական, ռազմական և եկեղեցական շփումներով, այլ հետաքրքիր դրվագներ կան նաև ծագումով սյունեցիների՝ Արցախում իրականացրած գործունեության և հակառակի մասին: Այդ առումով հատկանշական է նաև Արցախում հարս գնացած սյունեցի իշխանագուն կանանցից Ասփայի գործունեությունը, որի մասին վկայություններ կան վիմագիր արձանագրություններում և ձեռագիր մատյաններում:

Սյունյաց նշանավոր իշխան Տարսայիճ Օրբեյանն ուներ չորս որդի և երկու դուստր: Առաջին կնոջից՝ Արուզ Խաթունից ծնված երեխաներն էին Ելիկումը, Ստեփանոսը (Սյունյաց տան նշանավոր պատմիչը), Փախրադուլան, իսկ երկրորդ կնոջից՝ Մինա Խաթունից, ով նշանավոր Ջալալ Դոլայի դուստրն էր, ծնված երեխաներն էին Ջալալը, Ասփան և Մամբանը¹:

Տարսայիճ Օրբեյանի և Մինա խաթունի դուստր Ասփան ամուսնացած էր Խաչենի իշխան, Դոփյան տոհմից Գրիգոր Բ-ի հետ: Սյունեցի այս իշխանուհին, հարս գնալով Արցախ, այնտեղ ձեռնարկեց շինարարական և նվիրատվական գործունեություն: Իր գործունեությունը հավերժացնող բոլոր արձանագրու-

* Հոդվածը ներկայացվել է 22.11.2019 թ., գրախոսվել՝ 15.12.2019 թ., տպագրության ընդունվել՝ 20.12.2019 թ.:

¹ Տե՛ս **Յովսեփեան Գ.**, Տարսայիճ Օրբեյանի եւ Մինա Խաթունի սերունդը, «Հասկ», հայագիտական տարեգիրք, Ա տարի, Անթիլիաս-Լիբանան, 1948, էջ 6:

թյուններում Ասփան նշում էր, որ դուստրն է «արքայաշուք Տարսայիճի» և «թագագարմ Մինա խաթունի»:

Խթրավանքը կամ Խաթրավանքը եղել է Դոփյան տոհմի գերեզմանատունը: Վանքի անունը արձանագրություններում և աղբյուրներում հիշատակվում է նաև Խաղարի կամ Խաղայի վանք: Այս անունը, հավանաբար, ծագել է Թադեոս առաքյալի Խաղ կամ Խաթ աշակերտի անունից, որին նվիրված էր վանքը: Խաթրավանքը գտնվում է Վաղուհաս գյուղից արևմուտք մոտ 8 կմ հեռու, ձորերով շրջապատված մի դժվարամատչելի լեռնահարթակի վրա, որի ստորտոտվ հոսում է Թարթառ գետը¹:

Իշխանուհի Ասփան կառուցել է բեմի սեղանը, ինչի մասին թողել է հետևյալ արձանագրությունը.

«Շնորհիւ Քրիստոսի եւ Ասփէ դուստր արքայաշուք իշխանին Տարսայիճին, թագագարմ մարն իմոյ Մինախաթունին, նպաստ եղեալ քրիստոսապսակ գլխոյ իմոյ մեծափառ իշխանին Գրիգորի սուրբ եկեղեցոյս, կամեցայ ի ձեռն քահանայապետին մեծի տեսան Յովհաննիսի՝ զիմ յարդար ընչից կանգնեցի Բեմի սեղան ի զենմանն Քրիստոսի, զի ամենայն կիրակէ եւ շաբաթ տաւն ծննդեան եւ տեառնընդառաջին, զատկի, զվարդավառին, աստուածածնին եւ սուրբ խաչի ինձ կատարի պատարագ զամէն եկեղեցիքս, որ եւ տուի զմեր Խաս հողն Բլրի հանդի զսենեկպան. ա. բահի ջուր, թէ ոք ի մերոյ կամ զպատարագն խափանէ, ի փառաց որդւոյն Աստուծոյ, որոշեալ եղիցի»²:

Մակար եպս. Բարխուտարյանցից բացի՝ սույն արձանագրությունը հրատարակել են նաև Սարգիս արքեպս. Ջալալյանցը³ և Հովհ. եպս. Շահխաթունյանցը⁴: Տեղին նշենք, որ

¹ Տե՛ս Դիվան հայ վիմագրության, պր. 5, Արցախ, կազմ.՝ **Բարխուտարյան Ս.**, Երևան, 1982, էջ 121:

² **Բարխուտարեանց Մ.**, Արցախ, Բագու, 1895, էջ 194-195: Հմմտ. Դիվան հայ վիմագրության, պր. 5, էջ 129:

³ Տե՛ս **Ջալալեանց Ս.**, Ճանապարհորդութիւն ի Մեծն Հայաստան, մասն Բ, Տիֆլիս, 1858, էջ 206:

⁴ Տե՛ս **Շահխաթունեանց Յ.**, Ստորագրութիւն Կաթողիկէ Էջմիածնի և հինգ գաւառացն Արարատայ, հ. Բ, Էջմիածին, 1842, էջ 362:

երեք հեղինակներն էլ արտագրել են իրարից, իսկ բուն աղբյուրը՝ Եսայի կաթողիկոսի ձեռագիրն է¹:



Խաթրավանք

Պատմաբան Շահեն Մկրտչյանը նշում է, որ միջնադարյան Հայաստանում մի գեղեցիկ սովորություն է եղել. վանական շենքեր կառուցելիս նրա պատերի մեջ դրել են հին խաչքարեր և արձանագրություններ, պատմական հիշատակների հետ կապված հին առարկաներ և իրեր: Եվ, այսպիսով, կառուցված շենքը դարձել է յուրահատուկ թանգարան: Դրա լավագույն օրինակ է Խաթրավանքը, որի պատերի մեջ երևացող տասնյակ խաչքարերով ու վիմագրություններով կարելի է բացել գավառի նախընթաց պատմության և մշակույթի շատ ծալքեր, որոնց մասին ուրիշ աղբյուրներ գոյություն չունեն²:

Վանքը բաղկացած է երեք եկեղեցիներից, գավթից, բնակելի ու կոմունալ շինություններից: Խաթրավանքի կաթողիկեի շինարարական արձանագրությունը 1204 թվականից է և հայտնում է, որ եկեղեցին կառուցել է Հովհաննես Խաչենեցին: Եկեղեցին ներքուստ խաչաձև, արտաքինից ուղղանկյուն, չորս

¹ Տե՛ս Դիվան հայ վիմագրության, պր. 5, էջ 129:

² Տե՛ս **Մկրտչյան Շ.**, Լեռնային Դարաբաղի պատմաճարտարապետական հուշարձանները, Երևան, 1980, էջ 44:

անկյուններում ավանդատներով հորինվածք ունի: Հատակագծում անհամաչափ է: Աղոթասրահի մեջ ներառված են ուղղանկյուն բեմ ունեցող միանավ թաղածածկ երկու մատուռները: Այդ առումով այն բացառիկ է հայ ճարտարապետության մեջ: Եկեղեցու ներսի սյուները սրբատաշ գորշ քարից են, զարդարված քանդակներով: Չորս սյուներից առաջին երկուսը ամբողջական, իսկ մյուսները երկուական կտոր քարից են բաղկացած: Նրանց խարիսխներին քանդակված են ավետարանիչների խորհրդանիշներ: Բեմն ավագ սեղանով տեղավորված է արևելյան պատի կիսաշրջանի մեջ: Կան նաև երկու մեծ և երկու փոքր խորաններ: Ներսի պատերը ծեփված են կրաշաղախով: Եկեղեցուն կից է փլված զանգակատունը: Նրա կիսավեր պատերից երևում է, որ զանգակատունը եղել է կրկնահարկ տորոնագույն քարով երեսպատված: Զանգակատան արևմտյան մասում է գտնվում թաղածածկ դահլիճի տիպի սեղանատունը: Արևելքից արևմուտք ձգվող այս շինությունն իր դիրքով բավականին կարևոր դեր է խաղում համալիրի ճարտարապետության ընդհանուր լուծման մեջ: Սեղանատունը համենատարբար լավ է պահպանված: Պատերը և թաղը կառուցված են տեղական կոպտատաշ քարերով ու կրաշաղախով, միայն թաղակիր կամարները և որմնասյուներն են շարված սրբատաշ քարով¹:

Խաթրավանքի արձանագրություններից մեկն էլ հիշատակում է Ասփայի կողմից կամուրջի կառուցման մասին: Արձանագրությունն ունի հետևյալ բովանդակությունը.

«Կամանն Աստուծոյ ես Ասփայ դուստր մեծ իշխանին Տարսայիճին և Մինախաթունին և ամուսին Նսկազար իշխանին Գրիգորի որդոյ մեծ իշխանին Հասանայ քաջի Տեառն Աղուանից կանգնեցի զխաչս. շինեցի զկարմունջս. յիշատակ հոգւոյ մերոց անցնելոց ներկայից և ապագայից»²:

¹ Տե՛ս նույն տեղում, էջ 45:

² **Ջալալեանց Մ.**, նշվ. աշխ., էջ 206:

Ասփայի կողմից բեմի սեղանի և կամուրջի կառուցումը վկայող վիմագիր արձանագրությունները չեն պահպանվել, և Դիվան հայ վիմագրության 5-րդ հատորում դրանք զետեղված են Եսայի կաթողիկոսի ձեռագրի արտագրությունից, և նշվում է, որ վանքի և Վաղուհաս գյուղի արանքում՝ Թարթառ գետի վրա մնում են այդ կամուրջի խելերը, իսկ ձախ ափին՝ ժայռերի վրա՝ կրաշաղափի տեղերը, որտեղ էլ կանգնեցված է եղել խաչքարը¹:

Սակայն, ինչպես նշում է նշանավոր հայագետ Գարեգին Հովսեփյանը, Ասփայի բարեգործության ամենամեծ հուշարձանն իր արդար վաստակով գնած և ծաղկած «Թարգմանչաց» հայտնի Ավետարանն է: Ձեռագիրն այդ անունը ստացել է Գանձակի մոտ գտնվող Թարգմանչաց վանքում պահվելու պատճառով²: Երկայուն գրությանը Ավետարանն ունի 30,1X23,2 սմ մեծության մագաղաթյա սպիտակ, լավ մշակված 372 թերթ³: Ըստ Գ. Հովսեփյանի՝ Ավետարանը գրված է 1202 թվականին երկաթագրով՝ Տիրացու գրչի ձեռքով: Ծաղկողը Գրիգոր երեցն էր, առաջին ստացողը Հովհաննես ավագերեցն էր, իսկ Ասփան՝ երկրորդ ստացողը⁴: Ավետարանի հիշատակարանը տեղեկություններ է հաղորդում Ասփայի, Գրիգոր իշխանի, Դոփեանց մյուս իշխանների մասին, իսկ հիշատակարանի վերջում ասվում է. «Ձմեճ եւ զամենարինեալ պարոնաց պարոն Գրիգոր որդի Դոփին եւ զամենագովելի զբարեպաշտ ամուսին իւր զպարոն Ասփայն, զստացողք եւ զարդարիչք սուրբ աւետարանիս յիշեցէք ի Քրիստոս»⁵: Մատթեոսի վերջի հիշատակարանն էլ նշում է, որ Ասփան զարդարել է «...զանազան սպասիւք եւ շինուածիւք զեկեղեցիս Հայաստանեայց, ստացաւ եւ սուրբ

¹ Տե՛ս Դիվան հայ վիմագրության, պրակ 5, էջ 130:

² Տե՛ս **Յովսեփեան Գ.**, Խաղբակեանք կամ Պոռշեանք Հայոց պատմութեան մէջ, Անթիլիա-Լիբանան, 1969, էջ 435:

³ Տե՛ս **Չուգասզյան Լ.**, Գրիգոր Ծաղկողի արվեստի ուսումնասիրման պատմությունը, ԼՀԳ, Երևան, 1985, N 8, էջ 103:

⁴ Տե՛ս **Յովսեփեան Գ.**, նշվ. աշխ., էջ 436:

⁵ Նույն տեղում, էջ 436:

աւետարանս յարդար ընչից իւրոյ եւ ընծայեաց ի սուրբ ուխտն Խաղարիւ, որ Դովեանց գերեզմանատունն էր»¹:

«Թարգմանչաց» Ավետարանը պահվում է Մաշտոցյան Մատենադարանի Հ⁴ 2743-ի տակ: Ավետարանի ուսումնասիրությունը սկսվել է 19-րդ դարում: Ձեռագիրը սկզբում գրավել է ազգագրագետների ուշադրությունը: 1842 թվականին Մարգիս արքեպս. Ջալալյանը հրատարակել է մատյանի հիշատակարանների մի մասը: 1895 թվականին Մակար եպս. Բարխուտարյանը լույս է ընծայել հիշատակարանները՝ ավելի ամբողջական տեսքով, իսկ մատյանի նկարագարդումներն առաջին անգամ գիտական շրջանառության մեջ է դրել Գ. Հովսեփյանը²:

«Թարգմանչաց» Ավետարանը Խաթրավանքից տեղափոխվելուց հետո մինչև 1900 թվականը պահվել է Թարգմանչաց վանքում: 1900 թվականին Գ. Հովսեփյանը ձեռագիրը վանքից տեղափոխել է Էջմիածնի Մատենադարան: Ավետարանի մանրամասն ուսումնասիրությամբ, ծաղկողի, գրչության ձևերի վերլուծությամբ հետազայում զբաղվել է աղբյուրագետ-ձեռագրագետ Արտաշես Մաթևոսյանը³:

Հավելենք, որ իշխանուհի Ասփան մահացել է 1311 թվականին և թաղվել Խաթրավանքում. «...Յայսմ ամի, որ էր թին ԶԿ (1311) փոխեցաւ յաշխարհէս Ասփայ»⁴: Կնոջ հիշատակի համար Գրիգորը կատարել է մեծամեծ նվիրատվություններ, զարդարել է տալիս Ավետարան, Խաթրավանքին է նվիրել այգիներ, գյուղեր և այլն:

Այսպիսով, իշխանուհի Ասփան, ժառանգելով մոր՝ Մինա Խաթունի շինարարությամբ ու նվիրատվությամբ զբաղվելու աստվածահաճո մեծ շնորհը, հարս գնալով Արցախ, շարունակեց Օրբելյանների և Դովյանների հայրենանվեր գործունեությունը:

¹ Նույն տեղում:

² Տե՛ս **Չուգասզյան Լ.**, նշվ. աշխ., էջ 59:

³ Տե՛ս **Մաթևոսյան Ա.**, Թարգմանչաց Ավետարանը, ամսագիր հայրապետական պոռոռոյ Ս. Էջմիածնի, Էջմիածին, սեպտեմբեր-հոկտեմբեր-նոյեմբեր, 1992, էջ 102-105:

⁴ **Ուլուբաբյան Բ.**, Խաչենի իշխանությունը X-XVI դարերում, Երևան, 1975, էջ 318:

**ԴՐՎԱԳՆԵՐ ՏԱՐՄԱՅԻՃ ՕՐԲԵԼՅԱՆԻ ԴՈՒՍՏՐ
ԱՍՓԱՅԻ ԳՈՐԾՈՒՆԵՈՒԹՅՈՒՆՆԻՑ**

ԱՍՓՈՓՈՒՄ

ԳԱՅԱՆԵ ՇԱԲՈՒՆՑ

Տարսայիճ Օրբելյանի և Մինա Խաթունի դուստր Ասփան, ամուսնանալով Խաչենի իշխան Դովյան տոհմից Գրիգորի հետ, Արցախում զբաղվել է շինարարական և նվիրատվական գործունեությամբ: Ասփան Խաթրավանքում հովանավորել է բեմի սեղանի կառուցումը, ինչպես նաև հիշատակություն կա կամուրջի կառուցման մասին: Ասփայի բարեգործություններից էր նշանավոր «Թարգմանչաց» Ավետարանը, որի երկրորդ ստացողն էր նա:

Բանալի բառեր - Ասփա, Խաթրավանք, «Թարգմանչաց» Ավետարան, Սյունիք, Արցախ, նվիրատվություն, շինարարություն:

ЭПИЗОДЫ ИЗ ДЕЯТЕЛЬНОСТИ ДОЧЕРИ ТАРСАИЧА ОРБЕЛЯНА АСПЫ

РЕЗЮМЕ

ГАЯНЕ ШАБУНЦ

Дочь Тарсаича Орбеяна и Мины Хатун Аспа вышла замуж за Григора из рода князя Допяна в Хачене. В Арцахе она занималась строительством и благотворительной деятельностью. Аспа выступила спонсором строительства алтарного стола в монастыре Хтра и также есть упоминание о строительстве моста. Результатом благотворительной деятельности Аспы является известное Евангелие «Переводчика», вторым получателем которого была сама Аспа.

Ключевые слова: Аспа, Хатраванк, Евангелие «Переводчиков», Сюник, Арцах, дарение, строительство.

EPISODES FROM THE ACTIVITIES OF TARSAYICH ORBELYAN'S DAUGHTER ASPA

SUMMARY

GAYANE SHABUNC

Tarsayich Orbelyan and Mina Khatun's daughter Aspa married Grigor deriving from Prince Dopyan's tribe in Khachen. In Artsakh she was engaged in construction and donation activities. Aspa sponsored the construction of a stage table in Khtra Monastery, and there are some minutes about the construction of the bridge as well. One of Aspa's charities was the notable Translator's Gospel, the second recipient of which was Aspa.

Key words: Aspa, Khtra Monastery, Translators' Gospel, Syunik, Artsakh, donation, construction.

ԳՐԱԿԱՆՈՒԹՅՈՒՆ

1. **Բարխուտարեանց Մ.**, Արցախ, Բագու, 1895, 461 էջ:
2. **Ջալալեանց Ս.**, Ճանապարհորդություն ի Մեծն Հայաստան, մասն Բ, Տփղիս, 1858, 458 էջ:
3. Դիվան հայ վիմագրության, պրակ 5, Արցախ, կազմեց՝ **Ս. Բարխուդարյան**, Երևան, 1982, 274 էջ:
4. **Մաթևոսյան Ա.**, Թարգմանչաց ավետարանը, ամսագիր հայրապետական աթոռոյ Ս. Էջմիածնի, Էջմիածին, սեպտեմբեր-հոկտեմբեր-նոյեմբեր, 1992, էջ 102-115:
5. **Մկրտչյան Շ.**, Լեռնային Ղարաբաղի պատմաճարտարապետական հուշարձանները, Երևան, 1980, 216 էջ:
6. **Յովսեփեան Գ.**, Խաղբակեանք կամ Պոռշեանք Հայոց պատմութեան մէջ, Անթիլիա-Լիբանան, 1969, 425 էջ:
7. **Յովսեփեան Գ.**, Տարսայիճ Օրբէլեանի եւ Մինա Խաթունի սերունդը, «Հասկ», հայագիտական տարեգիրք, Ա տարի, Անթիլիաս-Լիբանան, 1948, էջ 1-25:
8. **Շահխաթունեանց Յ.**, Ստորագրութիւն Կաթուղիկէ Էջմիածնի-հինգ գաւառացն Արարատայ, հ. Բ, Էջմիածին. 1842, 561 էջ:
9. **Չուգասոյան Լ.**, Գրիգոր Ծաղկողի արվեստի ուսումնասիրման պատմությունը, ԼՀԳ, Երևան, 1985, N 8, էջ 59-65:
10. **Ուլուբաբյան Բ.**, Խաչենի իշխանությունը X-XVI դարերում, Երևան, 1975, 453 էջ: